

**Oqaluuserisassanut nassuiaat.**

(Inatsisartut Siulittaasoqarfiat)

2011-imi upernaakkut ataatsimiinnermut UPA 2011-mut oqaluuserisassatut siunnersuutit, siunnersuutillu oqaluuserisassanut ilanngunneqarsimasut, ulloq 4. februar 2011 siullermeer-utaasumik nassiunneqarput.

Naalakkersuisut imm. 26 tunuartippaat, taamaattumillu siunnersuut oqaluuserisassanit aamma peerneqarluni.

Naalakkersuisut kissaateqarput imm. 29-ip siullermeerneqarnissaa martsip ulluisa aallaqqaataannit aappaannut nuunneqassasoq.

Naalakkersuisut kissaateqarput imm. 95-ip siullermeerneqarnissaa marsip ulluisa 15-ianniit qulinganut siuartinneqassasoq.

Siunnersuutit arlallit siusinnerusukkut ataatsimiinnerni siullermeerneqareerput upernarlu manna ataatsimiinnermut suliarineqaqqittussatut innersuunneqarsimallutik.

Siulittaasoqarfiup inassutigaa siunnersuutit taakku toqqaannartumik ingerlaannaq taasissutigisassanngortinneqassasut, Inatsisartuni oqallinnerup aallarteqqinneqarnissaanut immikkut pissutissaqanngikkaangat.

Inatsisartunut ilaasortat Naalakkersuisunulluunniit ilaasortat siunnersuutit pineqartut suliareqqinneqarneranni oqallisigeqqinneqarnissaat kissaatigigunikku tamanna sioqqullugu Siulittaasoqarfimmut nalunaaruteqartassapput.

Ulluni ataasiakkaani oqaluuserisassat ingerlaavartuussapput, taamaasillunilu immikkoortut ulormi oqaluuserineqarfissaminni angumerineqanngitsut ullormi ataatsimiinnermi tullermi oqaluuserineqartassallutik.

Inatsisartunut ilaasortat ataasiakkaat partiilluunniit oqaluuserisassanut oqaaseqaatissaqarunik kissaateqarunilluunniit qinnuigineqarsimapput tamanna pillugu Siulittaasoqarfimmut saaffiginneqqullugit ataatsimiinnerup aallartinnissaa sapaatip akunneranik ataatsimik sioqqullugu. Taamaaliortoqarsimanngilaq.

Naggataatigut ilanngullugu oqaatigissavara Inatsisartunut ilaasortat ataasiakkaat namminneq akisussaaffigimmassuk siunnersuutimik kalaallisut qallunaatullu paatsuugassanngitsunik oqaasertalerneqarsimasarnissaat. Oqaasertaliunneqarsimasut iluarsiiisuteqarfigineqarusuppata tamanna pisassaaq upernaakkut ataatsimiinnerup ingerlanerani siunnersuutip oqaluuserineqarnissaa sioqqullugu iluarsiiisutinik Inatsisartut Allattoqarfiannut nassiussinikkut.

Uparuagassaqartoqanngippat oqaluuserisassat akuerineqartut isigineqassapput.

Ullumikkut ataatsimiinnermi Inatsisartunut ilaasortat Anders Olsen, Siumut aamma Naaja Nathanielsen, Inuit Ataqatigiit taasisarnerit pillugit isumaqatigiissuteqarsimapput aammattaaq Knud Kristiansen, Atassut aamma Debora Kleist, Inuit Ataqatigiit piffissami marsip ulluisa aallaqqaataaniit pingajuanut 2011, kingulliulluni taaneqartup sulinngiffeqarnerani taasisarnerit pillugit isumaqatigiissuteqarsimapput.